



UNIVERSITÄTS-  
BIBLIOTHEK  
PADERBORN

## **Universitätsbibliothek Paderborn**

### **Conciliarvm Omnivm Generalivm Et Provincialivm Collectio Regia**

Ab anno CCCXIV. ad annum CCCXLVI.

**Parisiis, 1644**

Vita, Epistola Et Decreta Marci Papae.

**urn:nbn:de:hbz:466:1-15072**

ANNO  
CHRISTI  
335.

teris suis orthodoxas eorum virorum opiniones scripto comprehensas subiunxerit, quas omnes agnouimus sanas & ecclesiasticas esse. Quapropter iure admonuit, ut viri isti reciperentur, & coadunirentur cum ecclesia Dei, ut vos ex epistola eius exemplaribus cognoscetis, quæ nos ad pietatem vestram misimus. Credimusque vobis ipsis, veluti propria membra vestri corporis recuperantibus, magnum ex ea re gaudium latitiamque oborituram, dum ipsi viscera vestra, fratres scilicet & patres agnoscitis & recipitis, non solum presbyteris Arianis, sed vniuerso populo cum omni multitudine vobis restituto, quæ ob causam istorum virorum longo iam pridem tempore a vobis dissidebat: decetque vos, cognitis quæ hic acta sunt, quodque viri isti nobiscum communicauerunt, & a tanta sacra Synodo recepti sunt, quam promptissime eos, ut membra ecclesiæ coeant, & in pace sint, consalutare; maxime, quod promulgata & publice edita eorum fides indubitata & apud omnes approbatam apostolicam traditionem & doctrinam completatur.



VITA,

ANNO  
CHRISTI  
336.

EPISTOLA ET DECRETA  
MARCI PAPÆ.

**M**ARCUS natione Romanus, ex patre Prisco, <sup>b</sup> fedit annos duos, menses octo, dies viginti vnum. Fuit autem temporibus Constantini Augusti, & Nepotiani ac <sup>c</sup> Secundi consulum, <sup>e</sup> ex die Kalendarum Februariarum, <sup>d</sup> vsque in diem Kalendarum Octobris. <sup>e</sup> Hic constituit, ut episcopus Ostiensis, qui consecrat episcopum Urbis, tunc <sup>f</sup> pallio vteretur, & ab eodem episcopo Urbis Romæ consecraretur. Et constitutum de omni ecclesiastico ordine fecit. Hic fecit duas basilicas, vnam via Ardeatina, vbi requiescit; & aliam in vrbe Roma, iuxta Palatinas. Ex huius suggestione obtulit Constantinus Augustus basilicæ, quam <sup>g</sup> constituit via Ardeatina, fundum rosarum, cum omni agro campestri, præstantem

\* Facun-  
di

\* come-  
terium  
consti-  
tuit

Concil. Tom. 2.

Zzz



solidos quadraginta. In basilica in vrbe Roma obrulit hæc: patenam argenteam, pensantem libras triginta, amas argenteas duas, pensantes singulas libras viginti: scyphum argenteum vnum, pensantem libras decem: calices ministeriales argenteos tres, pensantes singulos libras duas. Coronam argenteam pensantem libras decem: Fundum Antonianum via Clodia, præstantem solidos triginta. Fundum \* Baccanas via Appia, præstan-  
 \* Morrea via Ardeatina, præstantem solidos quinquagintaquinque & \* tremissem. § Hic fecit ordinationes duas in vrbe Roma per mensem Decembrem, presbyteros vigintiquinque, diaconos sex, episcopos per diuersa loca viginti septem. Qui etiam sepultus est in cœmeterio Balbinæ, via Ardeatina, quod ipse constituens fecit, \* pridie Nonas Octobris. Et cessauit episcopatus dies viginti.

\* Vacca-  
nas\* trimi-  
sios  
\* Orrea\* trimi-  
sium v-  
num\* fecun-  
do No-  
nas

## N O T Æ.

Quo tem-  
pore Mar-  
cus sedem  
acceperit?

Athanasius  
relegatus in  
Galliam a  
Maximino  
Treueris  
honeste re-  
ceptus fuit.

Arius resti-  
tuitur Ale-  
xandrinæ  
vrbi.

\* *Marcus.*] Anno Christi 336. qui est Constantini trigessimus primus, post interregnum quindecim dierum, in locum Siluestri pontificis pie sancteque defuncti, Marcus natione Romanus subrogatus fuit. Huius pontificatu ingenti Eusebianorum motu concussa est ecclesia. Athanasius quasi minatus fuisset se impediturum, ne quid frumenti Alexandria Constantinopolim deucheretur, noua calumnia exagitata, ac de nouo crimine læsæ maiestatis per falsos ac subornatos Eusebianæ factionis testes conuictus, ab imperatore inaudita causa magno omnium catholicorum luctu ac mœrore in Galliam relegabatur: quem Maximinus episcopus, non vt profugum vel exulem, sed vt confessorem de impietate triumphantem Treueris excepit, eumque vt egregium fidei athletam magno in honore habuit. Vnde, quod aiunt, ipsum in puteo latitantem symbolum conscripsisse, fabulosum esse constat. Post relegatum Athanasium, Ariani de Ario Alexandrinæ vrbi restituendo supplicantes, eius restitutionem impetrarunt quidem; verum ille quantumuis libris Eusebianorum & imperatoris communitus fuisset, ab Alexandrinis ciuibus, eo quod a catholica fide alienus esset, vrbi ipsius aditu prohibitus Constantinopolim rediit: ibique in Conuentu malignantium, occasione Marcelli Ancyran, vt infra dicemus, congregato, sese imperatori sistens, de fide interrogatus, verbo & scripto fidem catholicam, per summam simulationem iuratus profitetur. Alexander Constantinopolitanus episcopus dum eum contra mandatum imperatoris in ecclesiæ communionem recipere nollet, violenterque ingerendum metueret, ipse



vna cum plebe ieiunij & orationum studio insistens a Christo impietatis Arianæ vindice impetrauit, quod dum Arius magno fastu Eusebianorum ad ecclesiam deducebatur, exonerandi alium necessitate ad locum secretiorem declinare compulsus, vna cum excrementis viscera diuino miraculo effundens, misere interierit. Ad hunc modum Ariana hæresi diuinitus condemnata, plurimi ex iis, qui ante decepti erant, conuersi sunt: ingens timor & exanimatio Eusebianæ factioni incussa est, fama rei per vniuersum fere orbem diuagata. Imperator tanto prodigio commotus, Arianos & Eusebianos, quos hæcenus Nicænæ fidei acerrimos defensores, & disciplinæ ecclesiasticæ fidelissimos custodes, ipsorum dolis, fraudibus, ac simulata pietate male persuasus existimauit, plane detestatus est: & Athanasium, quem calumniis Arianorum circumuentum temere in exilium relegauerat, ipse, prout constituerat, ab exilio reuocasset, si non morte præuentus fuisset. Hæc ex Athanasio, Rufino, Socrate & Sozomeno, Baronius anno 336. num. 2. 3. 4. & multis sequentibus.

Constantinus Athanasium ab exilio reuocare decernit.

<sup>b</sup> *Sedit annos duos, menses octo, dies viginti vnum.* ] Mensibus nouem minus nouem diebus sedisse patet ex Baronio appendice tom. 10. Hoc est quod Hieronymus in chronico disertis verbis ait, ipsum octo mensibus tantum sedisse. Et Sozom. lib. 2. cap. 19. ipsum ad exiguum tempus sedem tenuisse. Imo ipsius auctoris libri pontificalis testimonio constat, Iulium Feliciano & Maximo consulibus, anno nimirum Christi 337. sedere cœpisse, quomodo igitur Marcus pontificatum suum Nepotiano & Facundo consulibus anno Christi 336. auspiciatus, ultra biennium sedisse potuit? Marianus Scotus, Onuphrius alique plures ex recentioribus hanc nostram sententiam recte sectati, auctorem libri pontificalis deseruerunt. Baronius anno prædicto num. 61.

Quamdiu Marcus sederit.

<sup>c</sup> *Ex die Kalendarum Februarii.* ] Si pridie Kalendas Ianuarias anni Christi 335. Siluester Romanus pontifex sancte in Domino obdormiuit, & inde vsque ad initium pontificatus Marci cessauit episcopatus diebus quindecim, vt asserit in vita Siluestri, quomodo eiusdem Marci initium ad Kalendas Februarias differtur?

Libri pontificalis error.

<sup>d</sup> *Vsq; in diem Kalendarum Octobris.* ] Septima die mensis Octobris, qua anniuersaria eius natalis memoria ex antiquiore vsu in ecclesia agitur, diem suum obiisse, probabilius est. Baronius prædicto loco.

<sup>e</sup> *Hic constituit vt episcopus Ostiensis.* ] Consuetudo illa, qua Ostiensis episcopus Romanum episcopum consecrare solet, hoc tempore antiquior esse videtur: nam Dionysius papa a Maximiano Ostiensi episcopo consecratus fuisse legitur. Sanctus Augustinus in breuiculo collat. diei 3. cap. 16. agens aduersus Donatistas, huius ritus tamquam vetustissimi meminit. Baronius.

Ostiensis episcopus Romanum pontificem consecrat.

<sup>f</sup> *Pallio uteretur.* ] Pallium aliter Canone 12. Gangrensis Concilii, aliter hic accipitur. Ibi enim sumitur pro veste qua utebantur illi, qui vitam austeriorem monasticam professi, carni & mundo renuntiauerant, vt patet ex notis ibidem conscriptis: hic vero su-

Pallii accipio quotu-plex.



mitur pro indumento & insigni summi pontificis Romani, quo summus honor & plena eius potestas significatur: quodque ab eodem metropolitanis episcopis aliquando ob causas arduas & rationabiles impartiri solitum fuit. Hoc alias appellatur Phrygium, fortasse ideo, quod Phrygiorum opere crucibus contexi solet. Baron. anno 336. num. 63. Phrygium Cyrillo Alexandrino, cum vices pontificis in Concilio Ephesino sustineret, a Cælestino pontifice Romano collatum fuisse, ipsumque illud in Concilio Ephesino & in sacris solenniis more Romani pontificis vsurpasse scribunt Theodorus Balsamon in Nomocanonem: Photius tit. 8. c. 1. Baron. anno 430. num. 26. Quod asserit Hieronymus Rubeus, Ioanni eiusque successoribus Rauennatis ecclesiæ archiepiscopis, priuilegio Valentini imperatoris vsu pallii concessum fuisse, ipsorum archiepiscoporum confessione, apud Greg. lib. 2. epist. 54. extante, diluitur, qua vsu pallii non imperatori, sed Romano pontifici acceptum referunt. Edictum quod Hieronymus prætexit commentitium esse, & a schismaticis confictum ostendit Baronius anno 432. num. 92. 93. 94. & 95.

Phrygium  
quid, & cur  
sic dictum.

Pallium a  
Romano  
pontifice  
archiepi-  
scopis qui-  
busdam  
concessum.

Vsus pallii  
quando il-  
licitus.

Tempore ieiunii vsus pallii prohibitus fuisse videtur ex epist. 54. lib. 2. Gregorii papæ, qua aduersus Ioannem Rauennatem iure expostulat, quod tempore ieiunii per plateas & vias pallium gestaret, Baronius anno 451. num. 63. Adde pallii nomine omne operimentum in rebus sacris significatum fuisse, vt lib. 2. epigr. 3. declarat Venantius Fortunatus, vbi vela oblata sanctæ cruci pallia nominat. Vide Baronium anno 336. num. 64.

<sup>2</sup> *Hic fecit ordinationes duas per mensem Decembrem.* ] Hæc qua fide auctoris scripta sint, patet ex præcedentibus.

EPISTOLA SANCTI ATHANASII  
ET ÆGYPTIORVM EPISCOPORVM  
AD MARCVM PAPAM.

De numero Canonum Nicænorum pro exemplaribus  
Nicæni Concilii, quia Ariani eorum  
exemplaria incenderant.

*Domino sancto & apostolici culminis venerando Marco sanctæ  
Romanæ & apostolicæ sedis atque vniuersalis ecclesiæ papæ,  
Athanasius & vniuersi Ægyptiorum episcopi.*

**A**D vos peruenisse non dubitamus, quanta & qualia ab hæreticis, & maxime ab Arianis quotidie patimur: quoniam intantum ab eis persequimur, vt etiam viuere iam nos tædeat. Nam instanti tempore subito & insperate in nos irruentes, nosque iuxta præceptum Domini qui



ait: *Si vos persecuti fuerint in vna ciuitate, fugite in aliam,* Matth. 10.  
 fugiendo propter cladem populi eos declinantes, nos  
 comprehendere non valuerunt, sed omnia depopulati  
 sunt. Intantum enim nostra vastauerunt, vt nec libros,  
 nec vestimenta ecclesiastica, aliaque ornamenta, nec reli-  
 qua utensilia nobis dimitterent. Libros vero nostros vs-  
 que ad minimum incendentes, nec iota vnum relinquētes,  
 propter veritatis fidem, etiam Nicænam Synodum, qua  
 modo clerus & populus imbuebatur, & maxime iam im-  
 buti erant, in contumeliam nostram & omnium Christia-  
 norum incenderunt. Quapropter precamur, pater bea-  
 tissime, quia non dubitamus apud vos plenaria esse Nicæ-  
 ni Concilii exemplaria, vt nobis illa, quæ sanctæ recorda-  
 tionis prædecessoris vestri Siluestri fuerunt, sub tuta mit-  
 tatis stipulatione. Nam quando prædictæ Synodo cum  
 beatæ memoriæ Alexandro, digno Deo pontifice nostro,  
 id est, Alexandrinæ magnæ ciuitatis episcopo, in diaco-  
 natus interfuimus officio, sub nostræ præsentis testimo-  
 nio, per beatos viros Victorem & Vincentium presbyte-  
 ros, apostolicæ sedis apocrisarios, missa sunt prædicto pa-  
 pæ Siluestro cum adstipulatione subnexa capitula septua-  
 ginta. Sane præsentibus nobis octoginta capitula in me-  
 morata tractata sunt Synodo, scilicet quadraginta à Græ-  
 cis, Græca edita lingua, & quadraginta a Latinis, similiter  
 Latina edita lingua. Sed visum est 318. patribus, sancto  
 Spiritu repletis, in prædicto Concilio congregatis, & ma-  
 xime iam dicto Alexandro, & apostolicæ sedis apocrisia-  
 riis, vt decem capitula adunarentur aliis, atque congruis  
 locis infererentur; & ad formam septuaginta discipulo-  
 rum, vel potius totius orbis terræ linguarum, septuaginta  
 tanti & tam excellentis Concilii fierent capitula, quæ  
 omnem Christianorum informarent orbem, & omnes sub  
 sacerdotali & Christiano nomine degentes vna fides &  
 vna sacerdotalis atque clericalis regeret norma, nec quis-  
 quam a suo dissideret capite. Nunc ergo quia (vt prædi-  
 ctum est) ab inimicis sanctæ Dei ecclesiæ, & maxime ab  
 Arianis, a quibus quotidie expugnamur, conterimur, &  
 opprimimur, præfata septuaginta Nicæni Concilii capitu-  
 la, quæ de præfata Synodo iam facta, iubente domino meo  
 Alexandro, decreto omnium episcoporum attuli, quæ



etiam coram omnibus recitauit, atque transcripsi, sunt igne combusta; optamus ut a vestra sedis auctoritate, quæ est mater & caput omnium ecclesiarum, ea ad correctionem & recreationem fidelium orthodoxorum percipere per præsentem legatos mereamur, quatenus vestra fulta auctoritate, vestrisque precibus roborati, illæsi a memoratis æmulis sanctæ Dei ecclesiæ, & nostris euadere, nobisque commissos eruere valeamus. Vere nouimus apostolatus vestri cor gratia sancti Spiritus intantum esse accensum, ut omnibus oppressis succurratis: quanto magis nobis, qui licet exigui ordinis, tamen vestri sumus, vobisque obediens cum omnibus nobis cõmissis & sumus & semper esse volumus. Ideo decet, & oportet vos nobis hæc quæ rogamus, & alia quæ necessaria (iuxta sapientiam, quam vobis præstitit Altissimus) esse cognoueritis, absque tarditate præstare, ut tantæ miseræ squalores a fidelium mentibus detergantur, & quasi vulnus corpori infixum, auditu tantæ miseræ oberato, saluari curetur antidoto, ut diuino freti iuuamine, vestraque auctoritate atque auxilio roborati, aduersantiũ tergiuersationes euadere valeamus, atque inconcussõ vultu, non fraude cuiusquam percussis, assistere æterno iudici mereamur, & vocem audire inquam: *Euge serue bone & fidelis, quia super pauca fuisti fidelis, supra multa te constituam, intra in gaudium Domini tui.* Et subscriptio. Orantem pro nobis sanctum apostolatum vestrum longæuis Dominus conferuet temporibus.

*Matth. 25.*

## RESCRIPTVM MARCI PAPÆ AD ATHANASIVM

ET OMNES EPISCOPOS ÆGYPTIOS.

De missione capitulorum Nicæni Concilii.

*Dominis venerabilibus fratribus Athanasio, & vniuersis Ægyptiorum episcopis, Marcus sanctæ Romanæ apostolicæque sedis, & vniuersalis ecclesiæ episcopus.*

**D**OLEO, fratres, & nimium contristor super afflictione vestra, sed oppido consolor, quod vento agitata non estis arundo, sed recti in fide inter omnes procellarum & turbinum colluctationes incessanter perduratis.



Lectis ergo fraternitatis vestrae literis, vigorem constantiae vestrae, quem olim noueramus, agnouimus. Congratulantes vobis, quod ad custodiendum Christi gregem, pastorem curam vigilanter insequimini, ne lupi, qui sub specie ouium subintrarunt, bestiali sauitia simplices quoque dilacerent, qui non ad hoc subintrarunt ut aliqua correctione proficiant, sed ut ea quae sunt sana corrumpant. Quapropter moneo, & hortor dilectionem vestram, ut bonum quod incepistis adminiculante diuina gratia usque in finem perducere satagatis, veritatis voce monente: *Beatus qui perseverauerit usque in finem.* Vn - Marc. 14. de enim beata perseverantia, nisi de virtute patientiae? Nam, iuxta Apostolum, *Omnes qui volunt pie vivere in Christo, persecutionem patientur.* 2. Timoth. 3. Quae non in eo tantum computanda est, quod contra Christianam pietatem, aut ferro, aut ignibus agitur, aut quibuscunque suppliciis, cum persecutionum sauitiam suppleant, & dissimilitudines morum, & contumaciae inobedientium, & malignarum tela linguarum, quibus conflictationibus communia semper membra pulsantur, & nulla piorum portio conflictatione sit libera, ita ut nec periculis, nec otio careant, nec labore. Nam haec & omnia incrementa probabilium studiorum, & in eis usque in finem perseverantia, atque bonae voluntatis incrementa, ad Christi gratiam semper sunt referenda: ut in omnibus quae agimus Deus omni perfecte laudetur tempore.

De capitulorum namque veritate & numero Nicani Concilii, cui vos interfuisse literis vestrae fraternitatis significastis, a nostris, qui vobiscum vna interfuerunt, diligentioribus requisuimus colloctionibus: qui ita, ut vestrae testatae sunt literae, omnem nobis ordinem exposuerunt, & vestram epistolam per omnia veram esse testificati sunt: non ut nos aliquid sinistrum vestra ex parte arbitremur. Sed nos & vos, illosque absque vlla in posterum titubatione vnum sentire optarem, & sancta Romana ecclesia, quae semper immaculata mansit, & Domino prouidente, & beato Petro apostolo opem ferente, in futuro manebit, sine vlla haeticorum insultatione firma & immobilis omni tempore persisteret. His itaque peractis, diligenter requirentes in sancto nostra & apostolicae sedis scrinio,



eadem quæ sanctæ recordationis prædecessori meo Siluestro sunt directæ, septuaginta (sicut significastis) capitula illæsa inuenimus. Ipsa enim vobis propter auctoritatem & subscriptionem tantorum patrum, & eius magni Concilii, minime misimus, sed pro eisdem coram apocryphicis vestris alia similia, eundem numerum, eademque verba, & ipsam subscriptionem continentia, vobis rescribere, & sub certa stipulatione & confirmatione mittere curauimus. Et quis est, qui fratribus suis talia negare audeat? nam non negligenda nobis hæc per sancti Spiritus gratiam Dominus docuit, sed fideliter exercenda, & fratribus contradenda, & docenda distribuit. Hæc apostolorum viua traditio, hæc est vera caritas, quæ prædicanda est, & præcipue diligenda ac fouenda, atque fiducialiter ab omnibus tenenda. Hæc sancta & apostolica mater omnium ecclesiarum Christi ecclesia, quæ per omnipotentis Dei gratiam a tramite apostolicæ traditionis nunquam errasse probatur, nec hæreticorum nouitatibus deprauanda succubuit, sed vt in exordio normam fidei Christianæ percepit ab auctoribus suis apostolorum Christi principibus, illibata sine tenus manet, secundum ipsius Domini saluatoris diuinam pollicitationem, qui discipulorum suorum principi in suis fatus est euangelis: *Petre, inquit, ecce Satan expetiuit, vt cribraret vos, sicut qui cribrat triticum: Ego autem pro te rogaui, vt non deficiat fides tua: & tu aliquando conuersus confirma fratres tuos.* Consideret itaque vestra excellens prudentia, quam bonum sit persistere in dispensatione vobis credita, & in fide recta, atque hæreticis & æmulis Christi repugnare, & nunquam a veritatis tramite declinare, quoniam Dominus & saluator omnium, cuius fides est, qui pro nobis mori non dubitauit, & proprio nos suo redemit sanguine, qui fidem beati Petri non defecturam promisit, & confirmare eum fratres suos admonuit. Quod apostolicos pontifices meæ exiguitatis prædecessores confidenter fecisse semper cunctis est cognitum, quorum & pusillitas mea, licet impar sit, & infirma, pro suscepto tamen diuina dignatione ministerio pedisequa cupit existere. Væ enim erit nobis, qui huius ministerii onus susceptum habemus, si veritatem Dominile-su Christi, quam apostoli prædicauerunt, prædicare neglexeri-

Luc. 22.



lexerimus. Væ etiam erit nobis, si silentio veritatē oppresse-  
rimus, qui erogare nummulariis iubemur, id est, Christia-  
nos populos imbuere & docere. Quid in ipsius Christi fu-  
turo dicturi sumus examine, si sermonis eius veritatem  
confundimur prædicare? Quid erit de nobis, cum de com-  
missis nobis animabus, & de officio suscepto, rationem iu-  
stus iudex Christus Deus noster districtam exegerit? Ideo,  
fratres, hortor dilectionem vestram, obtestor & moneo,  
vt qua debetis & potestis sollicitudine vigiletis ad inuesti-  
gandos hæreticos, & inimicos sanctæ Dei ecclesiæ, & a sa-  
nis mentibus, ne pestis hæc latius diuulgetur, seueritate  
qua potestis pro viribus extirpetis. Quoniam vt habeat a  
Deo dignæ remunerationis præmium, qui diligentius  
quod ad salutem commissæ sibi plebis proficiat fuerit exe-  
cutus, ita ante tribunal Domini de reatu negligentia se  
non poterit excusare, quicumque plebem suam contra sa-  
cilegæ persuasionis auctores noluerit custodire. Data  
octauo Kalendas Nouembris, Nepotiano & Secundo  
viris clarissimis consulibus.

## N O T A.

\* *Rescriptum.* ] Epistola Marci ad sanctum Athanasium episcopum  
Alexandrinum, & ad ceteros Ægypti episcopos, Nepotiano & Fa-  
cundo consulibus, x. Kalendas Nouembris scripta legitur, cuius ar-  
gumentum ex epistola Athanasii aliorumque eiusdem prouinciæ epi-  
scoporum ad eundem Marcum intelligitur hoc fuisse: nempe Ægy-  
ptios dira Arianorum persecutione vexatos, inter alia Nicænorum  
Canonum, qui vna cum omnibus aliis libris ab iisdem incensi fuerunt,  
exemplar a Romana ecclesia iisdem datis ad Marcum papam literis  
postulasse. Quibus quidem literis, tum Ægyptiorum, tum Marci,  
Nicænorum Canonum numerus definitur, nimirum ab eadem ma-  
gna Synodo statuta fuisse septuaginta, secundum, vt aiunt, nume-  
rum discipulorum, capitula. Baronius num. 58. Hanc surreptitiam  
& ab aliquo confictam fuisse quinque rationes euidenter ostendunt.  
Quarum prima hæc est: quod in controuersia inter Africanam ec-  
clesiam & Romanos pontifices Zosimum & Bonifacium agita-  
ta, de numero Nicænorum Canonum, hæc epistola illis nequaquam  
cognita fuerit. Secunda, quod Athanasius, vt ex præcedentibus  
constat, hoc tempore in Galliis exulauerit, adeoque hac de re ad Ro-  
manum pontificem Alexandria scripsisse non potuerit. Tertia,  
quod grassatio illa in Alexandrinam ecclesiam multis annis post hæc  
tempora sub Constantio contigerit, quando nimirum Athanasio  
expulso Gregorius quidam Arianus in locum eius ordinatus est, vt  
*Concil. Tom. 2.*

Argumen-  
tum episto-  
lae.

Epistolæ  
Marci ad  
Athanasium  
& Athana-  
sii ad Mar-  
cum suspen-  
sæ & dubi-  
æ fidei  
sunt.

Ratio 1.  
Ratio 2.  
Ratio 3.



Ratio 4.

testatur Athanasius in epistola ad omnes orthodoxos. Quarta, quod Marcus Nonis Octobris huius anni Constantino imperatore adhuc viuente defunctus fuerit: ideoque non possit non suspectum esse de fide, quod X. Kalendas Nouembris Nepotiano & Facundo confu-

Ratio 5.

libus hanc epistolam scripsisse legatur. Quinta: Si Marcus papa exemplum misisset ad Alexandrinos ex Romano scrinio, certo conuenissent deinceps inter se exemplaria Romanum & Alexandrinum: quomodo ergo in exemplari a sancto Cyrillo ex Alexandrino ad Africanos misso, isti tres Canones de appellationibus deerant, qui in Romano inueniebantur? Idem igitur qui, vt bene confuleretur assertioni Zofimi & Bonifacii de Nicæno Canone extra numerum vicenarium allegato, epistolam illam Bonifacii papæ ad Eulalium episcopum Alexandrinum de restituta communionem ecclesiæ Africanæ confinxit, has easdem Marci ad Athanasium, & Athanasii ad Marcum confinxisse & concinnasse putatur. Baron. anno 336. num. 59. & 60. Bellarminus lib. 2. de Rom. pont. cap. 25.

• C O N C I L I V M  
 C O N S T A N T I N O P O L I T A N V M  
 OCCASIONE MARCELLI ANCYRANI  
 CELEBRATVM AB ARIANIS.

ANNO  
 CHRISTI  
 336.

N O T A.

<sup>a</sup> *Concilium.*] Cum Ariani in Concilio Nicæno Marcellum Ancyranum in Galatia episcopum suæ factioni infensissimum aduersarium sensissent, ipseque vocatus ad encænia Hierosolymitanæ ecclesiæ cum Eusebianis communicare nollet, ad imperatorem rem detulerunt: huius auctoritate deinde ad Synodum Constantinopolitanam anno Christi 336. celebratam dicturus causam conuocatus, comparuit cum propinquiorebus episcopis fere omnibus Eusebianis Eusebius Nicomediensis: Eusebius Cæsariensis, Theognis, Patrophilus, Ursacius, & Valens Arianorum antesignani, eo fine vt Athanasium sede sua, modo quo supra in notis ad vitam Marci diximus, exturbarēt, illuc conuenerant. Vbi cum Athanasium per nouam calumniam in exilium expulissent, viribus omnibus laborarunt, vt Marcellus alter fidei catholicæ defensor acerrimus eadem sententia percelleretur. Itaque post multas calumnias, eum crimine hæreseos falso infimulatum, quasi contra Asterium scribens cum Paulo Samosateno sentiret, Christumque purum hominem esse doceret, condemnarunt, & episcopatu abdicatum in exilium eiecerunt. Deinde hac re pro voto suo egregie peracta, Arium ob infidelitatis & hæresis suspensionem ab Alexandrinis reiectum, recte & orthodoxe sentire Ariani iudicant. Iuramento eandem fidem professus, in ecclesiæ communionem recipi ab imperatore iubetur, idque deinde, quod supra in notis ad Marci vi-

Causa Con-  
 cili.

Qui inter-  
 fuerunt.

Acta Con-  
 cili.